

D^a ROSA-ANA PRADA QUEIPO SECRETARIA DO CONCELLO DE AMES NA PROVINCIA DA CORUÑA

CERTIFICO: QUE O PLENO DESTE CONCELLO LEVOU A CABO SESIÓN EXTRAORDINARIA E URXENTE O 18 DE NOVEMBRO DE 2010, DESA REUNIÓN REDACTOUSE A CORRESPONDENTE ACTA QUE É DO TEOR LITERAL SEGUINTE.

ACTA DA SESIÓN EXTRAORDINARIA E URXENTE LEVADA A CABO POLO PLENO DO CONCELLO O DÍA 18 DE NOVEMBRO DE 2010.-

No Salón de Sesións da Casa do Concello de Ames, ás dezanove horas e trinta minutos (19:30) do día dezoito de novembro de 2010, reúnese o Pleno do Concello en sesión extraordinaria e urxente de primeira convocatoria, baixo a presidencia do Sr. alcalde don **Carlos Antonio Fernández Castro** e coa asistencia dos/as señores/as concelleiros/as seguintes:

Grupo municipal socialista	Grupo municipal Popular	Grupo municipal do BNG
Patricia Conde Lois Carmen Fraga Crespo M ^a Isabel González Cancela José Manuel Miñones Conde Gustavo Nieto Santiago Úrsula Seijas Seoane José Varela Abeledo Francisco Villaverde Marcos	Santiago V. Amor Barreiro M ^a Dolores Fernández Álvarez Ramón García Argibay Emilio Martínez Carballeira Bernardo Moar Míguez Alfonso Rey López Ana Ruso Valiña	Olalla Alvite del Río José Ramón Arufe Vidal Xosé M. Fernández López Vitor Vicente Díaz Mercedes Vidal Baamonde

Asisten a señora **interventora** dona María del Carmen Castro Louzao e o señor **tesoureiro** don Santiago González Prado.

Actúa como **secretaria** a titular da Corporación dona **Rosa-Ana Prada Queipo**.

O señor alcalde don **Carlos Antonio Fernández Castro** saúda a todas/os as/os presentes e da comezo a sesión extraordinaria e urxente do Pleno municipal correspondente ó día 18 de novembro de 2010.

Punto primeiro.- Ratificación da urxencia da convocatoria.

O señor alcalde don **Carlos A. Fernández Castro** comeza dicindo que como convocante desta sesión plenaria procede que explique o porqué de acudir a un procedemento de sesión extraordinaria e urxente. O motivo non é outro que a conveniencia, a oportunidade e a necesidade, ademais de predicar, de dar trigo, Hai uns días tivo entrada no concello unha liquidación de cotas extraordinarias da Mancomunidad de Concellos Serra do Barbanza que se axusta ó plantexado dende sempre polo concello de Ames. É procedente se así o acorda o pleno aprobar estas cotas extraordinarias, aprobar tamén os expedientes de recoñecemento extraxudicial de crédito que lles dean cobertura e como consecuencia abonarlle a Mancomunidad unha contía aproximada aos 200 mil euros, toda vez que agora si estamos de acordo nas cifras que nos prantexan como cotas de servizos extraordinarios realizados nos anos 2006 e 2007.

Toda vez que para hoxe estaba prevista a celebración dun pleno extraordinario para, entre outros asuntos, debater sobre unha proposta da alcaldía sobre a planta de Servia, entendín, como alcalde, que non só era oportuno e convinte que debatíramos longo e tendido sobre Servia e os seus condicionantes, moito mellor de o que houberamos feito ás 12 da noite daquel xoves do mes pasado, pero ademais de debater, ademais de predicar sobre Servia, eu entendía que tamén era necesario dar trigo e na situación económica que ten a Mancomunidad, que este concello lle poda transferir 200 mil euros motiva que sexa tratada esta cuestión nunha sesión extraordinaria e urxente. De ratificarse a urxencia pasaríamos a tratar o punto segundo, o punto terceiro e o punto cuarto. No caso de que non se ratifique a

urxencia deixaríamos sin tratar o punto segundo, o punto terceiro e o punto cuarto e quedarían para mellor ocasión.

Corresponde polo tanto en primeiro lugar votar sobre a ratificación da urxencia. Sometida a votación, a urxencia é ratificada por unanimidade dos membros da corporación.

Punto segundo.- Aprobación da cota extraordinaria pola prestación de servizos realizados pola Mancomunidad de Concellos Serra do Barbanza polos conceptos, “enquisa” e “asesoría” e que ascenden a 20.099,11 euros e do correspondente expediente de recoñecemento extraxudicial de crédito que lle dea cobertura orzamentaria.

Intervén o señor alcalde don **Carlos A. Fernández Castro** que di que para a presentación deste punto, de marcado carácter económico, dálle a palabra en principio, a concelleira de Economía e Facenda.

Toma a palabra dona **Patricia Conde Lois** que saúda ós asistentes e comeza dicindo que procede, como se dixo no inicio da sesión plenaria, debater e de ser o caso aprobar ás modificacións extraordinarias e as cotas extraordinarias que traemos a pleno. Farei unha exposición conxunta que engloba os tres puntos que serán votados logo separadamente, e que son: aprobación da cota extraordinaria por un lado, aprobación da modificación extraordinaria do servizo por outro e o procedemento a seguir nas modificacións que se introduzan pola orde do concello.

Como expliquei na Comisión informativa por fin se chegou entre o Concello de Ames e a Mancomunidad Serra do Barbanza a un acordo polo que levabamos tres anos discutindo. Foi un proceso longo que nos últimos meses veu culminado nun acordo de data do 14 de outubro de 2010. En definitiva ese día chegamos a un acordo entre a Mancomunidad e o Concello de Ames que ben a dar a razón ao concello en todo aquilo que discrepabamos e no que mantivemos un longo proceso de negociación. A Mancomunidad logo do acordo do 14 de outubro emitiu unhas liquidacións o pasado 8 de novembro, e dende o momento en que son recibidas no concello, son catro liquidacións diferentes e separadas, se emite unha providencia da alcaldía para que polos servizos se inicie o seu estudo, e poder aprobar nun pleno vindeiro. O 15 de novembro foi informado este tema e se produxo a convocatoria de forma urxente da comisión informativa para ditaminar este asunto e poder aprobalo hoxe no pleno. A súa aprobación supoñerá para a Mancomunidad un ingreso de uns 202.000 euros.

Continúa dicindo que procede aprobar tres puntos, en primeiro lugar, unha cota extraordinaria pola prestación de servizos realizados pola Mancomunidad de Concellos Serra do Barbanza polos conceptos, “enquisa” e “asesoría” e que ascenden a 20.099,11 euros paralelamente se da aprobación ao correspondente expediente de recoñecemento extraxudicial de crédito que ampara a súa cobertura orzamentaria. En segundo lugar se aproba a modificación extraordinaria do servizo correspondente aos anos 2006 e 2007 e se asume un compromiso de dotación orzamentaria para o ano 2011 da que teña repercusión para os anos seguintes así como as modificacións que se introduciron nos anos 2008 e 2009. Por último aprobar o procedemento a seguir nas modificacións que o concello ordene introducir no servizo xa que nin sequera nos pregos estaba establecido, é un procedemento que está xa consensuado ca empresa concesionaria. Quedarían sobre a mesa en concreto, dúas liquidacións, unha liquidación correspondente a cota extraordinaria que emite a Mancomunidad en concepto dun camión que non xustifican economicamente, non fan un informe técnico detallado onde se analice o desequilibrio económico que supón para a concesionaria e polo tanto mentres non teñamos esta información non poderemos tramitala. Tamén quedaría pendente a liquidación da modificación do servizo dos anos 2008 e 2009 en tanto en canto a día de hoxe só existe cobertura orzamentaria para os anos anteriores.

Toma a palabra polo grupo municipal do BNG don **Xosé Manuel Fernández López** que di: Nos xa votamos na comisión e agora volvemos a facelo aquí a favor da urxencia. Efectivamente consideramos que esta aportación de 200.000 euros á Mancomunidade é urxente e case extraordinaria. A desgraza é que estanse a converter en extraordinarios, por ser pouco ordinarios, os pagos do concello de Ames. Neste caso, poderíase aplicar o dito de mais vale paxaro en man que cento voando, mais vale 200.000 euros que 600.000 que debemos e non pagamos. Así neste pleno, vou a ser repetitivo vamos a tratar, un primeiro punto que é aprobar a cota extraordinaria pola prestación de servizos realizados pola Mancomunidade de Concellos Serra do Barbanza polos conceptos, “enquisa” e “asesoría” que ascenden a 20.099,11 euros, segundo aprobar a modificación extraordinaria do servizo de recollida e tratamento de residuos sólidos urbanos correspondente aos anos 2006 e 2007 e aprobación do correspondente expediente de recoñecemento extraxudicial de crédito que lle dea cobertura económica ata o ano 2008, e compromiso orzamentario de incluír no 2011 o que teña repercusión económica nos anos 2009 e 2010, así como as modificacións introducidas nos anos 2008 e 2009 e terceiro, aprobar o procedemento a seguir nas modificacións que o concello ordene introducir no servizo.

Algúns dirán porqué leo isto outra vez, hai que lelo, porque convén aclaralo, porque as veces non sabemos nin o que tratamos, a improvisación e a confusión convertéronse nas características predominantes ultimamente nos procedementos das convocatorias de plenos e nos acordos plenarios e así numerosas veces hai diferentes interpretacións sobre o que se acorda. Esta semana convocouse un pleno extraordinario para hoxe ás 8:30, un pleno que xa contábamos que fora a semana pasada e incluso podería ser evitable. A continuación convócase un pleno extraordinario para as 7:30, realízase unha comisión informativa cunha proposta da alcaldía que na mesma reunión é revisada, retocada polo departamento de secretaría, polo tanto parece que a improvisación e a confusión é unha tónica dominante. Nós xa dixemos porqué considerábamos que isto era urxente, se son 200.000 euros o que se lle da a Mancomunidade nos próximos 15 días bendito sexa despois da débeda que temos, non lle vamos a poñer ningún tipo de impedimento, nin poñer paus nas rodas para que non se poidan facer eses pagos, faltaría máis, que xa bastante retraso levan.

Neste concepto de modificacións extraordinarias, as débedas do concello de Ames alcanzan a cifra de 569 mil euros, case 600.000 euros, case 100 millóns de pesetas, esa é a cifra e ese é o quid da cuestión, e isto segundo os informes de tesourería e segundo o resume da reunión do 14 de outubro da comisión de seguimento do convenio. En todo caso pasaríase de 560.000 euros, esa é a cifra real da débeda do concello de Ames só en concepto de modificacións extraordinarias no 2006, 2007, 2008, 2009, nos conceptos asesoría, enquisa e participación do camiión. Efectivamente o que está claro pola reunión do 14 de outubro é que o concello aceptou esa cantidade, que falten uns detalles técnicos non quere dicir que non acepten os 81 mil euros como débeda do camiión, polo tanto a débeda está cerca dos 600 mil euros. Despois está outra débeda de explotación do servizo que pasa de 1.200.000 euros e entre as dúas van cerca dos 2 millóns de euros, e esta é unha débeda tamén aceptada polo goberno municipal, non está en cuestión, outra cousa é que haxa mais ou menos cartos para pagar, esa é a nai do cordeiro desta tormenta que se desatou en Ames nos últimos meses. Ante esta situación o concello de Ames di, que non temos dispoñibilidade económica suficiente, só podemos facer fronte a un tercio, é como aquilo de eu deber, débocho, pagar non cho pago, pero deber, débocho, non chas nego, pero non teño cartos e non chas pago. Esta débeda veu engordando día tras día e ademais adóptase unha solución, que ó mellor non hai outra, mala porqué é desvestir un santo para vestir outro. O informe do departamento de intervención o di claramente, vou leer, que é pouquiño, o informe do departamento

de intervención, despois explico, “de aprobar en sesión plenaria estas liquidacións, a aplicación orzamentaria afectada a mesma a que se imputa o gasto a recollida de lixo”, da un número, “ten crédito suficiente”. É dicir temos crédito suficiente para pagar estes 202.000 euros, non obstante, estes cartos tíñamos gardados para amparar outros pagos que eran a revisión ordinaria de prezos do 2009 a aprobar en 2010 e as liquidacións de atrasos correspondentes á revisión de prezos do 2008. No suposto de que no que queda de ano se recibisen notificacións destas liquidacións ou solicitudes da revisión de prezos, non se poderían tramitar porque non habería crédito. Por outra banda, respecto da bolsa de vinculación xurídica, o que queda nesa bolsa de diñeiro, sería un crédito de 8.047 euros para seguridade e mobilidade cidadá, vivenda e urbanismo, benestar comunitario, saneamento, abastecemento, distribución de auga, recollida, eliminación e tratamento de residuos, limpeza viaria, alumado público e outros servizos, e medio ambiente, parques e xardíns, protección e mellora do ambiente. Hai que aclarar que hai un pé de páxina que di que o crédito de 8.047 euros refírese os novos gastos, en todo caso teñen garantía orzamentaria os distintos contratos que están en vigor, os contratos da Mancomunidade, da limpeza urbana e outros mais pero si hai que facer gastos a maiores en calquera destes servizos públicos básicos, quédannos 8.000 euros de crédito, por iso dicimos que é desvestir un santo para vestir a outro, o que se chama habitualmente enxeñería financeira.

O Bloque que dí sobre isto, que é mala solución pero que é a que hai, a nosa posición é que se pague dunha vez e que o concello de Ames non colabore mais a debilitar a posición económica da planta de Servia. Creemos que hoxe tiñan que vir ó pleno todas as débedas, polo menos as liquidadas, dotalas de orzamento e abonalas xa definitivamente. Pero non foi así, o goberno deixou que as débedas foran engordando e agora non se pode pagar, so págase unha parte e adquírese o compromiso económico de pagar outra parte o ano que ven, xa veremos, se non chegamos a un novo pleno para falar destes mesmos temas. O grupo municipal do BNG vai facilitar que aboen á Mancomunidade estes 202.000 mil euros, que é un tercio do que terían que pagar, e reclamámoslle ao goberno que dunha vez por todas aboen o resto da débeda para que o concello de Ames deixe de estar en boca de todo o mundo e na prensa como un concello de pouca confianza, polo momento nada mais.

Intervén o señor alcalde don **Carlos A. Fernández Castro** que advirte que este pleno debería acabar antes das 8:30 para ter plenas garantías xurídicas de iniciar o seguinte pleno dentro da hora. Da as grazas pola súa intervención ao voceiro do grupo municipal do BNG xa que vai facilitar a aprobación de estes puntos.

Toma a palabra o voceiro do grupo municipal popular don **Santiago Amor Barreiro** que saúda a todos os presentes e comenza dicindo: O que está claro é que a Mancomunidade Serra de Barbanza e o grupo de goberno recoñecen que a débeda destes últimos catro anos, soamente en cotas extraordinarias, ascende a 569.000 euros, nisto hai acordo. Nos gustaría chamar a atención sobre a grave situación que se está a vivir neste concello a pesar deste acordo, porque hoxe imos tomar un acordo polo que só imos poder pagar, esperamos que nestes próximos días, canto antes mellor, 202.000 euros, que representa o 40% das cotas extraordinarias que se deben, e o 60% restante, é dicir 360.000 euros, quedarían para o próximo ano ou para saber cando, porque segundo os datos que nos facilitaron, hai acordo nesa liquidación dos anos 2006 e 2007 que son 398.000 euros redondeando, hai unha cota extra do ano 2007 que son 20 mil euros, unha liquidación da cota do camión que son 81 mil euros e unhas modificacións do servizo dos anos 2008, 2009 que son 69.000 euros, total 569.000.403 euros, dos cales só temos dispoñibles para pagar 200.000 euros. Fago propio o dito polo compañeiro do BNG, imos a desvestir un santo para vestir outro.

Antes de continuar co punto me gustaría facer, aínda que as comparacións son odiosas, unha comparación con outro concello no que está en folga tamén o servizo de recollida de basuras, o concello de Carnota. Pois ben, o concello de Carnota no ano 2007 cando se renova a corporación tiña preto de catro millóns de euros de débedas a provedores nos que se incluían as débedas coa Mancomunidade Serra do Barbanza, aproximadamente 500.000 euros. Agora mesmo, o concello deses catro millóns de euros debe 2 millóns de euros, iso sí, a cantidade que ten pendente ca Mancomunidade da Serra do Barbanza está en torno ós 400.000 euros, é dicir reduciu a cantidade que lle debe á Mancomunidade non a incrementou, ao marxe que reduciu a débeda que herdou cando entrou na lexislatura. Gústame tamén dar outros datos que son significativos, o concello de Carnota recada por IBI aproximadamente 300.000 euros, o concello de Ames 4 millóns de euros, é dicir a capacidade que ten Carnota a hora de recadar cartos e a hora de xerar ingresos non é a mesma que ten Ames. O que recada Carnota pola taxa do servizo está en torno ós 15.000 euros mentres que o coste do servizo é 32.000 euros. Dada esta pincelada de datos, me gustaría dicir que na convocatoria que se facía no día de onte de comisión informativa urxente, a proposta tivo unha modificación pola secretaría do concello, eu entendo que con bo criterio.

Antes de entrar en profundidade nos puntos que se propoñen me gustaría falar dos antecedentes: O concello de Ames inicia a súa relación contractual coa Mancomunidade de Concellos Serra do Barbanza o 1 de xaneiro de 2006 e hoxe imos a tratar ampliacións do servizo que se fixeron no ano 2006 e posteriores, non vou a entrar se o prego estaba ben ou estaba mal, o que queda claro é que hai unha desidia, unha incompetencia e unha falta de xestión que está a producir a situación actual, como máis tarde comprobaremos. Pero a responsabilidade non vai a ser do grupo do goberno, iso xa o temos claro, vai a ser da Xunta de Galicia, vai a ser de Ecoembes, vai a ser da Mancomunidade de Concellos Serra do Barbanza, de FCC, dos traballadores, do partido popular e incluso lle votarán a culpa á vaquilla que matou a Manolete. A situación actual a día de hoxe é que o concello de Ames debe mais de 1 millón de euros á Mancomunidade de Concellos Serra do Barbanza, o que está a provocar grandes prexuízos para Ames porque agora mesmo con plan de retencións, nos van a privar dunhas cantidades que nos van a reter do Fondo Galego de Cooperación, que é tan necesario para este concello. Ademais as decisións extemporaneas tomadas fai catro anos polo grupo de goberno van a provocar que para o que queda de ano, tal e como figura no informe de intervención, que foi facilitado na mañá de hoxe, partidas que neste momento teñen dispoñibilidade económica, como poden ser seguridade, orden público, urbanismo, vías públicas, saneamento, abastecemento, alumado público, medio ambiente, etc van a quedar reducidas en torno ós 8.000 euros. A realidade é que o grupo de goberno lle compensa a folga, e non só lle compensa senón que a está fomentando, e estas acusacións, que poden soar duras, o son polo seguinte: O grupo de goberno conseguiu desviar a atención do problema nos medios de comunicación aínda que non na rúa, despois de tantos anos de pufo, se fala da folga e de todo o que conleva pero en realidade o problema segue, non se fala das débedas, non se fala da viabilidade da planta, que segue en perigo por ese pufo que mantén o grupo do goberno. Aproveito para recordarlle que neste pleno, este voceiro xa lle advertiu en moitas ocasións de que esta situación podería chegar a darse, dado o desastre económico ó que está levando a este concello. A situación irresponsable atópase cunha actuación responsable, creo que con bo criterio, da consellería de Facenda da Xunta de Galicia á hora de facer o plan de retencións. A Mancomunidade, inicialmente propoñía que en vez de embargar 70.000 euros, foran 180.000, polo que se deduce, se van reter en torno a 70.000 euros, e se non fora así, se se retivesen os 180.000, se podería poñer nunha situación de quebra técnica a este concello. Xa naquel momento e supoño que hoxe tamén se nos acusou de alarmistas, pero unha

vez mais o tempo nos da a razón ao igual que os xuíces. Ao concello de Ames e ao grupo de goberno lle compensa a folga porque así intenta quedar diante da opinión pública como vítima e cando se poña fin a ela, van a presumir, ou van a intentar presumir de que bo somos que lle imos gañar a batalla ós traballadores, é unha triste vitoria, Xa sei que vostede ten o discurso preparado, o grupo de goberno e vostede en particular en realidade é un provocador, e aí están os argumentos e os medios de comunicación, é lamentable que vostede presuma de sindicalista e actúe como está actuando, recórdome de aquel dito que dí dime de que presumes e che direi de que careces. Dase a circunstancia de que unha manobra similar a practicaron vostedes na limpeza dos colexios e dos centros educativos de Ames, quixeron paralizar e ralentizar a solución do problema co único motivo do seu ego persoal, ou incluso outras manobras que se intentaron facer na tarde de hoxe, pedirlle á Xunta de Galicia, pedirlle a Sogama que aceptara a basura de Ames, argumentando que se deixaban meter a basura alí, volvíamos para Sogama, está claro señor alcalde que para volver para Sogama fai falta un acordo plenario e vostede hoxe intentou o xogo do trilero ca Xunta de Galicia e con Sogama.

Intervén o señor alcalde don **Carlos Antonio Fernández Castro** para dicirlle o voceiro do grupo municipal popular que está faltando á verdade.

Don **Santiago Amor Barreiro** continua dicindo: O motivo real polo que se chega a esta situación é que vostede estivo mareando a perdiz durante estes anos co único fin de gañar tempo, e ver si a situación económica melloraba, a ver si viña outro Plan E, si viña unha promotora, ou calquera outra cuestión que aportara ingresos para paliar o desastre económico da súa xestión, en forma de excesivo gasto corrente, como se pode ver nas rendicións de contas do ano 2008. Así coma eses incumprimentos orzamentarios que estivemos a ver, non se chegou a facer nin o trinta por cento das inversións do concello, incluso non foi quen de colocar esa cantidade de solo que tiña presupostado en 12 millóns de euros, por iso a día de hoxe non lle saen as contas, nin lle van a saír. A realidade esta na xestión económica deste concello e na súa habilidade, que recoñezo, preferiría que tivera outras, a hora de desviar, manipular ou tergiversar. Ao final eu creo que se lle vai a volver en contra, pola cantidade de débedas que acumula, cada semana aparece unha débeda, agora estamos falando da débeda coa Mancomunidad Serra do Barbanza, pero hai outras débedas mais pequenas, de pequenos empresarios, de pequenas tendas de Milladoiro e de Bertamiráns. Me gustaría facerlle unha pregunta ¿onde está a meter os cartos que recada pola taxa da recollida de basuras?. Á vista do informe que fai o tesoureiro onde di que a previsión deste último cuadrimestre do ano, é que imos rematar o ano cun déficit de tesourería negativo de – 1.186.288 euros, agora nos explicamos porqué non se renden as contas a tempo, non hai interese de amosar a realidade da situación económica. Remato volvendo a facer a mesma pregunta, ¿onde está o que se recada pola taxa de lixo, que está en 800.000 euros ao ano, segundo di o informe do tesoureiro?

Toma a palabra o alcalde do concello **Carlos A. Fernández Castro** para dicir dirixíndose ó señor Amor, falta vostede á verdade, utiliza falacias na súa intervención. A parte da bisonñez que xa empezan a recoñecer os periódicos e de ver xigantes de desgoberno local, como lle dedica unha editorial hoxe nalgún xornal, aparte desa bisonñez que eu veño dicindo dende fai moito tempo, minte. Para levar o lixo de Ames, o que xa estamos a facer hoxe triunfalmente e que xenerou que moitos veciños e veciñas viñeran a saudarme, a felicítame e a dicirme olé, olé, olé, ademais diso, que eu sei que lles doe, temos autorización da Mancomunidad Serra do Barbanza para levar o lixo á planta de Servia, polo tanto non nos fai falta, pedir autorización a Sogama de levar alí o lixo, pero tamén lle digo mais, para levar o lixo a Sogama, non nos faría falta ningunha falsa promesa de ir a traballar con Sogama no futuro, entre outras cousas porque temos razóns de forza maior para poder levar o lixo a Sogama,

se iso fose necesario ocasionalmente. Eu creo que non o vai a ser porque temos a autorización escrita do presidente da Mancomunidad Serra do Barbanza e polo tanto imos ampararnos nesa autorización escrita para poder levar o lixo a nosa planta. Moi probablemente despois do segundo pleno non teñamos nin que levala a ningún sitio, creo que o comité de folga está vendo as orellas ao lobo e van a recuar a partir desta noite e xa me anticipo eu a dar a primicia, o comité sabe que se meteu nun berenxenal e vai a recuar.

Vostede está sempre moi preocupado polas contas deste concello, mire, a conta do ano 2009, a única que nos falta actualmente estará a súa liquidación en 15 días aproximadamente e é a única que nos falta, pero dígolle mais, hai unha serie de concellos en Galicia que están chamados a declarar no tribunal de contas do estado por non ter presentadas as contas e entre eses non está o concello de Ames. Polo tanto menos alarmismo señor Amor, as contas van a saír nos vindeiros meses, e estou seguro que nos van a saír nos próximos catro anos, teremos a oportunidade de seguir véndonos aquí, seguramente vostede no sitio no que está e eu no que estou, e verá vostede como van a saír as contas, e verá vostede como ten que recoñecer que un goberno que deixou de ingresar por razóns de urbanismo tres millóns de euros cada ano, terminará sendo quen de cadrar as contas a pesares desa terrible perda. Aínda así este concello segue a funcionar, e vai pagando cada vez mellor, e imos recuperando cada vez mellor as posicións que nun momento determinado foron bastante complicadas e bastante difíciles.

Intervén polo grupo municipal socialista dona **Patricia Conde Lois** que di: Quería dar resposta aos dous grupos municipais, en primeiro lugar o discurso moi bonito do señor Amor, pero que en definitiva non debateu sobre as cuestións que se van a aprobar neste pleno. Fala de modificación na orde do día e tal e como se lles informou na comisión informativa, van a aprobar o mesmo que estaba na proposta de alcaldía, o que pasa é que se fai unha mellor reestruturación para proceder a súa votación dunha forma máis clarificada.

Menos alarmismo e menos acusacións de improvisación, porque era clara a intención do que propoñía aprobar o goberno municipal. Falan sobre as modificacións que dende o 2006 levamos intentando resolver, son modificacións que levaron moitas discrepancias, reunións continuas do concello coa Mancomunidad para chegar a un acordo, e das liquidacións que hoxe aprobamos correspondentes ao 2006 e ó 2007 hai unha diferenza de mais de 72.000 euros, xa que o concello de Ames mantivo o pulso á Mancomunidad e o final non terminou pagando, porque o peor, sería ter pagado 72.000 euros a maiores sen xustificación algunha. Chegouse a acordo ca Mancomunidad cando se puido e se trae a pleno parte da aprobación desas liquidacións. Eu expliquei que se trae o que é posible e o que está tecnicamente xustificado para proceder a súa aprobación plenaria e me resulta gracioso que vostedes digan que só se trae un tercio desas liquidacións, cando vostedes na comisión votaron en contra da urxencia de tratar este tema, polo tanto se fose gracias a vostedes, non estaríamos hoxe tratando esta aprobación de 202.000 euros para a Mancomunidad. En todo caso, aínda que así sexa, aínda que se aproben 202.000 euros se fará o ingreso correspondente e o ano que ven, dentro dun mes e medio se procederá a aprobar as liquidacións restantes para facer o abono correspondente, polo tanto menos alarmismo. Falar de que se viste un santo para desvestir outro, hai que leer os informes, evidentemente completos, cando se fala de que isto se vai a utilizar contra o que está retido para a revisión ordinaria de prezos de 2009 a aprobar en 2010, evidentemente, pero aínda a Mancomunidad non emitiu a liquidación correspondente, polo tanto non figura como débeda. No informe figura que non se tramitou porque a Mancomunidad non remitiu nada ó respecto. En todo caso, aínda que se emitira, moi probablemente non se aprobaría neste ano, polo tanto non falen de vestir un santo para desvestir outro, porque sabemos todos como é a realidade dun concello como é a tramitación administrativa. O que se aproba aquí son dúas

liquidacións que non figuraban como débeda, nin figuraban nese plan de pagamentos do que vostedes falan, son liquidacións que nunca se computaron como débeda porque nunca foi recoñecida polo concello, realmente se están recoñecendo hoxe.

Intervén o señor alcalde don **Carlos A. Fernández Castro** que di: Por certo, o señor Amor saca a bandeira de Carnota, pero por moito que saque iso o señor Amor, o grandioso, o magnífico, o arrollador é sempre o de Carnota, pero Carnota non se librou da folga señor Amor e está sendo vítima da mesma folga, exactamente igual. Hai algunhas diferencias que o señor alcalde de Carnota me comentaba hoxe, e me dicía a envexa que sentía da nosa posición.

Intervén polo grupo municipal do BNG don **Xosé Manuel Fernández López** que di: Espero non excederme moito no tempo, non sei se empezar polo compañeiro do partido popular, ou ben pola concelleira de facenda. En todo caso a respecto das liquidacións, eu leo perfectamente o informe e efectivamente no informe di que non se poderán aprobar mais liquidacións porque non hai crédito suficiente, polo tanto é , vestir un santo para desvestir outro, ou desvestir un santo para vestir outro, se chegan as liquidacións que faltan a semana que ven, qué facemos?, vostede, experta en política financeira e económica deste concello, qué fai?, esperar ó ano que ven?. Non nos toree porque leemos os informes, non alarmamos. É unha mala situación, é a que teñen, si, porque metéronse neste berenxenal e non dan saído del. Hai tantos buratos, que tapan uns pero saenlle os outros. Eu o que non acabo de entender humanamente é o que gaña o señor alcalde con esa actitude provocadora contestando o señor alcalde don **Carlos A. Fernández Castro** que disfruta.

Continua o señor **Xosé Manuel Fernández Lopez** dicindo: O ego persoal, a satisfacción persoal de provocar ós cidadáns, á xente e ós traballadores, eso é o que gana o alcalde de Ames , non é necesario, irá contento para a casa, porque estivo a pe de obra, teléfono aquí, o contenedor 5, o contenedor azul, a folga ilegal, porque ademais de alcalde é xuíz, veremos se a folga é ilegal ou non, ¿xa ten ese informe do que falou o outro día, desa petición de información que lle fixo á Dirección Xeral de Relacións Laborais?

Contesta o señor alcalde don **Carlos A. Fernández Castro** que en parte. Continua o señor **Xosé Manuel Fernández López** que di: ¿e que lle di, que é ilegal?, cando poida enxéñea, porque efectivamente pode ter razóns coma un mundo e hai diferentes perspectivas do mesmo tema, non o vou negar e que a pranta de Lousame ten mais problemas que a débeda do concello de Ames, si, claro que os ten, pero a provocación permanente deste alcalde é insultante e o que sementa ventos recolle tempestades, e as tempestades as sufrimos todos os veciños de Ames que non a sofre vostede so, polo tanto teña un pouco de autocontrol, defenda as posicións que teña que defender, as que queira, ca contundencia que queira, pero déixese de insultar e provocar á xente. Decirille ó compañeiro do partido popular que Carnota, se votamos contas a relación débeda por habitante, é o concello que mais débeda ten. En relación a que desviaron a atención do tema, efectivamente ao mellor ao señor alcalde e ao goberno municipal lle interesa esta folga, dende logo hoxe pola tarde non desviaron a atención, capitalizaron a atención nunha acción esquiroi de romper unha folga como nunca se tivera visto en Ames. Ata os veciños saían a beirarrúa para ver o espectáculo que se estaba dando hoxe pola tarde en Bertamiráns e no Milladoiro, e a todos nos gustaría saber, a estas horas, onde están os camións co lixo e onde verteron, se eses camións están homologados para recoller ese lixo e todas esas cousas, ou se en plan pistoleiro do oeste un pode sair cunha apaleadora e un camión e recoller o lixo, non veu a Ortoño, en Ortoño hai catro contenedores rebosando.

Intervén polo grupo municipal popular o señor **Santiago Amor Barreiro** que di: O que está claro señor alcalde é que vostede quixo apagar un lume que se estaba iniciando

con gasolina, e segue votándolle gasolina e o lume segue para arriba cas chamuscas, e segue alimentando ese lume non sei porqué, o único por ese ego persoal de eu son mais chulo que ninguén, porque as ameazas e as actitudes prepotentes que aínda hoxe demostrou neste pleno non sei ónde nos van a levar e recordan mais outros tempos, incluso algunhas películas que se podían ver. O que teñen que facer, dende a miña modestia, xa lle dixeran o outro día na xunta de voceiros, é buscar acordos e resolver os problemas, calquera representante público o que ten que intentar facer é resolver os problemas, non crealos, non avivar mais o lume que hai agora mesmo creado, e mire, vostede dirá o que queira, nos próximos días se saberá, vostede lle pediu á Xunta, e o volvo a dicir publicamente neste pleno, que lle deixaran levar a basura a Sogama e como dixeron que nanai da china, e como vostede intentou xogar ó trileiro, que llo volvo a dicir, señor alcalde, porque vostede xoga como fan os trileiros, intentando enganar ós demais, tivo que coller e dicir, a basura a outro sitio, a Lousame. Eu xa sabía que ía para Lousame, vostede removeu Roma con Santiago, chamou a algúns alcaldes para forzar esta situación e que presionaran á empresa. Xa para rematar, señora Conde xa sei que a vostede lle gustaría marcar o meu discurso pero non o vai a conseguir, ó mellor vostede non pode dicir o mesmo. Sobre a modificación dos acordos que introduzo a secretaria, señora Conde, aceptamos pulpo como animal de compañía, para que se quede tranquila. O que está claro é que a súa responsabilidade é pagar, que só ten 200.000 euros, habería que preguntar porqué non ten mais cartos. Para rematar, dicíamos na comisión que non entendíamos as presas por convocar un pleno extraordinario para tratar este tema cando había outro pleno para tratar o apoio a planta de Lousame e cando a próxima semán temos o pleno ordinario, a parte non estaba a documentación completa no expediente, aínda hoxe na última hora da mañá se nos facilitaron informes. Agradezo o tesoureiro e a interventora que nos fixeran chegar eses informes.

Intervén o señor alcalde don **Carlos A. Fernández Castro** para dicir: “Por orde da alcaldía”. Continua o señor **Santiago Amor Barreiro** dicindo: Non, porque o pedimos na comisión, a documentación non é que vostede autorice a que estea, é que ten que estar, vostede sega así, xa ten unha condena por vulneración dos dereitos fundamentais e se se cree mais chulo que un ocho, pois sega así que ao mellor lle cae outra condena, ó mellor por iso ou por outras cousas. Gustaríanos tomar o acordo de que se puideran pagar os 500 e pico mil euros, non 200 e pico mil, e entendemos que despois de catro anos para chegar a un acordo, o mais razoable, en función da situación, de non estar toda a documentación no expediente, sería que se levara ó pleno ordinario da próxima semana e hoxe se tratara, e non se intentara distorsionar o outro tema que imos a tratar no pleno das 20:30.

Rematadas as intervencións o pleno da corporación por maioría absoluta, cos votos a favor dos 9 membros do grupo municipal socialista e dos 7 membros do grupo municipal popular e a abstención dos 5 membros do grupo municipal do BNG, adopta os seguintes acordos:

Primeiro.-Prestar aprobación á cota extraordinaria pola prestación dos seguintes servizos realizados pola Mancomunidade de Concellos Serra do Barbanza: conceptos enquisa e asesoría e contidos na liquidación 3/2007 aprobada pola presidencia da Mancomunidade o día 10 de xullo de 2009 e revogada parcialmente por resolución do 4 de novembro de 2010 co resume que a continuación se indica:

COTA EXTRAORDINARIA DE 2007		
Enquisa	Asesoría	Total
8.355,48 €	11.743,63 €	20.099,11 €

Segundo.- Prestar aprobación ó correspondente expediente de recoñecemento extraxudicial de crédito que lle dea cobertura orzamentaria á aprobación da cota extraordinaria referida no apartado anterior

Punto terceiro.- Aprobación da modificación extraordinaria do servizo de recollida e tratamento de residuos sólidos urbanos correspondente aos anos 2006 e 2007 e aprobación do correspondente expediente de recoñecemento extraxudicial de crédito que lle dea cobertura orzamentaria á que teña repercusións económicas ata o ano 2008, e compromiso de dotación orzamentaria no orzamento 2011 da que teña repercusión económica nos anos 2009 e 2010, así como para as modificacións introducidas nos anos 2008 e 2009.

Rematadas as intervencións o pleno da corporación por maioría simple, cos votos a favor dos 9 membros do grupo municipal socialista e a abstención dos 7 membros do grupo municipal popular e os 5 membros do grupo municipal do BNG, adopta os seguintes acordos:

Primeiro.- Aprobar a modificación extraordinaria do servizo de recollida e tratamento de residuos sólidos urbanos correspondentes aos anos 2006 e 2007, con repercusións económicas ata o exercicio 2008, por un importe de 182.601,48 euros, como consecuencia dos investimentos de novos contenedores e áreas de aportación realizados pola concesionaria neses exercicios, co seguinte resume:

ANOS	2007	2008	TOTAL
Modificacións ano 2006	74.650,47 €	74.650,47 €	149.300,94 €
Modificacións ano 2007	0,00 €	33.300,54 €	33.300,54 €
TOTAIS	74.650,47 €	107.951,01 €	182.601,48 €

Segundo.- Prestar aprobación ó correspondente expediente de recoñecemento extraxudicial de crédito que lle dea cobertura orzamentaria á aprobación da modificación referida no apartado anterior

Terceiro.- Comprometerse a dotar orzamentariamente no orzamento 2011 o crédito orzamentario suficiente e axeitado que posibilite a aprobación das modificacións extraordinarias do servizo de recollida e tratamento de residuos sólidos urbanos correspondente aos anos 2006 e 2007 que teñan repercusión económica nos anos 2009 e 2010, así como para as modificacións introducidas nos anos 2008 e 2009, que teñan repercusións económicas nos anos 2009 e 2010.

Punto cuarto.-Aprobar o procedemento a seguir nas modificacións que o concello ordene introducir no servizo, en relación á recollida e tratamento dos residuos sólidos urbanos do concello de Ames.

Rematadas as intervencións o pleno da corporación por maioría simple, cos votos a favor dos 9 membros do grupo municipal socialista e a abstención dos 7 membros do grupo municipal popular e os 5 membros do grupo municipal do BNG, adopta os seguintes acordos:

Primeiro.- Prestar aprobación ó procedemento a seguir nas modificacións que o concello ordene introducir no servizo de recollida e tratamento de residuos sólidos urbanos, sendo o procedemento o que a continuación se indica:

1.- O concello de Ames, cando o considere procedente solicitará da Mancomunidade un informe técnico sobre a necesidade e procedencia de modificar un servizo, especificando as características ou condicións da modificación.

2.- A Mancomunidade reclamará este informe da empresa concesionaria dos servizos. O concello tamén poderá solicitar este informe directamente da empresa concesionaria.

3.- A empresa concesionaria do servizo, remitirá á Mancomunidade no prazo máximo dunha semana, o informe solicitado. De ser positivo, achegará co informe un orzamento no que se sinalará o custe global (que incluírá a totalidade dos servizos obxecto do Convenio) da modificación que se incorporará ó canón anual.

4.- A Mancomunidade daralle traslado ó concello de Ames do informe e orzamento.

5.- Coñecido o informe e custe da modificación, o concello de Ames, previos os informes xurídicos e de fiscalización da modificación, aprobará a mesma, e comunicaralle á Mancomunidade por escrito a aceptación das condicións económicas sinaladas no informe, de ser o caso.

6.- Recibida a aceptación do concello de Ames á Mancomunidade ordenaralle á empresa concesionaria a posta en servizo da modificación acordada, que se efectuará no prazo máximo de 15 días a partir da recepción da orde do concello de Ames.

7.- Na primeira quincena de cada ano, a concesionaria do servizo prestará na Mancomunidade, unha memoria anual con todas as modificacións ordenadas a introducir no servizo polo concello de Ames, coa correspondente liquidación.

A Mancomunidade procederá a remitir unha memoria-liquidación anual ó concello de Ames que se pagará e incorporará ó canón anual.”

Segundo.- Dar traslado deste acordo á Mancomunidade Serra do Barbanza para que previos os trámites oportunos introduza na cláusula do convenio a aprobación do procedemento establecido no apartado anterior.

Terceiro.- Delegar na Xunta de Goberno Local do concello, a aprobación destas modificacións.

E non habendo mais asuntos de que tratar, o señor alcalde presidente dou por rematado o acto e levantou a sesión ás vinte horas e trinta e cinco minutos do día dezaioito de novembro de 2010 , de todo o que eu como secretaria certifico.

Vº Prace
O alcalde,

A secretaria